

ALAHADY FANKALAZAN NIOVAN'I JESOA TAREHY TAONA A



Ny Tavany namirapiratra tahaka ny masoandro.

Ry Kristianina havana, izao Alahady izao dia Alahady faha-18 mandavantaona fa noho izy mifanojo amin'izao daty 06 aogositra izao izay ankalahana amin'ny fomba manetriketrika ny fiovan'ny Tompo tarehy teo an-tendrombohitra, dia izay fankalazana izay no tsaroantsika manokana anio ary mifanaraka tsara amin'izao fandalinam-pinoana ataontsika amin'izao taona hibanjinantsika manokana an'i Kristy mpiara-belona amintsika ary irintsika mba isika ihany koa ho tonga Kristy mpiara-belona amin'ireo manodidina antsika.

Vakiteny I : Dan. 7, 9-10. 13-14

Tononkira : Salamo 96

Vakiteny II : 2 Pier. 1, 16-19

Evanjely : Mt. 17, 1-9

Henontsika tamin'ny vakiteny voalohany dia ny bokin'i Daniela mpaminany fa rehefa ao amin'ny Tompo tokoa isika dia olom-baovao miova ny fiainana, miova ny fomba fijerentsika ka hahatonga antsika araka ny averimberintsika fa Izy Kristy mpiara-belona mpanarina, mpanangana fa sanatria tsy ho fandravana. Izany koa no averin'i Md Piera amin'ny vakiteny faharoa. Fantantsika àry

fa matoa niova tarehy i Jesoa teo an-tendrombohitra dia satria fantany ny hanjo azy sy ny mety hanozongozona ny finoan'ireo mpianatra ka nentiny i Piera, i Jakoba ary Joany tany an-tendrombohitra toerana mangingina ary dia niara-nivavaka izy ireo ka niova tarehy teo anatrehan'ireo mpianatra izy. Niova namirapiratra tahaka ny masoandro ary fotsy manjopiaka ny tarehin'i Jesoa izay manambara ny voninahitr'Andriamanitra.

Tian'i Jesoa ho tsapan'ireo mpianatra fa eo anivon'izy ireo tokoa izany voninahitr'Andriamanitra izany, eo anivon'izy ireo i Kristy mpiara-belona, izany no finoantsika ary izany koa no tian'i Jesoa ho tsapantsika sy ho tian'ny Eglizy ho tsapantsika amin'izao fankalazana izao.

Matoa isika mankalaza tsy hoe mahatsiaro fotsiny fa noho ny asan'ny Fanahy masina dia mivelona izay ankalazaina izay. Raha mankalaza an'i Jesoa miova tarehy isika dia mankalaza Andriamanitra be voninahitra mamirapiratra eo anivontsika ka hamirapiratra koa ny fiainantsika.

Aoka ho tsapantsika fa noharian'Andriamantira hitovy endrika Aminy isika. Hitan'ireo Apôstoly teo amin'i Jesoa niova tarehy ilay Endrik'Andriamanitra, io koa no hahatonga antsika ho Kristy mpiara-belona amintsika satria misy endrik'Andriamanitra isika.

Io no andrasan'i Jesoa amintsika, raha miombona aminy tanteraka isika dia mahita ny voninahitr'Andriamanitra ~~izany~~.

Ireo Apôstoly fa indrindra i Piera dia vakivava hoe “mahafinaritra ny mitoetra aty handeha hanorina trano lay telo isika dia ny iray ho anao, iray ho an'i Moizy, ny iray ho an'i Elia”, satria teo koa ireo mpaminany ireo ary fantratr'izy ireo fa izay misy an'i Jesoa dia miseho mihariry ny voninahiny. Raha miombona tokoa amin'Andriamanitra isika tahaka ny traikefa niainan'ireo mpianatra niaraka tamin'i Jesoa ireo raha miara-nivavaka isika ka miaraka amin'i Jesoa dia miova tanteraka tokoa ny fiainantsika. Izany ny fiovam-penitra mahery vaika vokatry ny fandraisantsika ny Fanahin'Andriamanitra ka hahatonga antsika hiombona amin'i Jesoa ho tonga zanak'Andriamanitra. Mitoetra ao Aminy isika ka ambaran'Andriamanitra Ray ary ny làlan-kombana ; "Inty ny zanako malalako henoy izy". Raha te-hahazo ny voninahitr'Andriamanitra isika, raha tiansika ho eo anivontsika hamirapiratra ny voninahitr'Andriamanitra sy ho lavitra ny fahoriana sy fijaliana dia fantaro fa amin'ny alalan'ny fihainoantsika ny tenin'Andriamanitra dia i Jesoa Izy ilay tenin'Andriamanitra eo anivontsika sy tenan'Andriamanitra mamelona antsika. Sarobidy tokoa ny tenin'Andriamanitra sy ny Eokaristia ka hahatonga antsika ho Kristy mpiara-belona amin'olona.

Rehefa avy tany an-tendrombohitra izy ireo dia nidina ka nanohy ny fiainana andavanandro. Nambaran'i Jesoa fa hijaly izy, toy izany koa isika izay miaina ao amin'i Kristy dia hopotehina isika, io ny ambaran'i Md Paoly : na dia hopotehina aza izy dia hamiratra. Manambara koa i Md Piera amintsika fa mampitsangana antsika i Jesoa àry aza matahotra, maniraka antsika i Jesoa. Ny fankalazantsika ny fiovan'ny Tompo tarehy dia manampy antsika hahatsapa fa eo anivontsika ny voninahitr'Andriamantira. Hahatsampantsika koa fa tsy maintsy mijoro isika manambara ny finoantsika eo amin'ny mpiara-belona amintsika ka hahatonga an'izao tontolo izao ho fonenan'Andriamanitra noho ny fiainantsika amin'izay maha zanak'Andriamanitra antsika izany. Arakaraky ny fiovan'ny fontsika hitovy amin'ny fon'i Jesoa ka hitondrantsika an'izay fo mizara fitiavana, mamelona fitiavana, hahatonga antsika tanora fa indrindra anio isika eto amin'ny diosezy mankalaza an'izao JMJ izao, andro ankalazantsika ihany koa an'i Jesoa miova tarehy, andro ihany koa hanamasinana an'ireo pretra sy diakra, miova ny fon'izy ireo ka isika rehetra miaraka amin'izy ireo miova ho Génération Mpanorina fa indrindra isika tanora ka zary Kristy mpiara-belona mitondra ny voninahitr'Andriamanitra eo amin'izao tontolo izao, hamirapiratra tahaka ny fiovan'ny Tompo tarehy, handova ny tany izany hoe ny Tranobe iombonana hanova ny fiaraha-monina. Raha hiova ny fiaraha-monina dia handray ny voninahitr'Andriamanitra isika ka hamirapiratra satria ny fontsika no miova.

"Sambatra ny malemy fanahy fa izy no handova ny tany", izay tany misy ny voninahitr'andriamanitra izay no lovantsika.

Ry tanora malala, tsy tanjona ny fankalazana ny JMJ ary indrindra ianareo pretra vao nohamasinina, ianareo no hanamasina, hitondra ny voninahitr'Andriamanitra ka hamirapiratra eo amin'ny mpiara-belona.

Tahaka ny nataon'i Jesoa niaraka tamin'ny Apôstoly no ataontsika mianakavy eto amin'ny diosezy izao dia ny miara-mivavaka. Nihataka i Jesoa niaraka tamin'i Piera sy Jakoba ary Joany, isika izao no ireo Apôstoly niaraka nivavaka tamin'i Jesoa ka hitondra izany fo vaovao izany ka hampiova ny endrik'izao tontolo izao,

ny endriky ny fiaraha-monina ka hamirapiratra. Hiova ny endriky ny fiaraha-monina raha "génération de bâtisseur et de constructeur" isika fa tsy hoe génération des démolisseurs.

Manorina tontolo vaovao isika araky ny voalazantsika amin'ny vavaka fiomanana tamin'ny JMJ, manomana tany sy lanitra vao amin'ity tranobe iombonana ka amin'izay hiadam-pinaritra, hahay hifankatia, dia hihavao tokoa ny fiainantsika, hamirapiratra ny fiainantsika, ho Kristy mpiara-belona tokoa isika ka ireo manodidina antsika hilaza hoe "Mitoera eto aminay, andao hanao tranolay, Enga anie ho tranolay hahatamàna ny olona ny fiainantsika manontolo. Manasa antsika hihavao tokoa ka hanavao ny fianan'ireo manodidina antsika.

I Jesoa niova tarehy anie hanampy antsika amin'izay ataontsika rehetra ka ho fiainan'i Jesoa ny fiainantsika fa indrindra ny fiainanan'ireo pretra vao nohamasinana ka hanamasina ny fianan'ireo manodidina antsika. Ianareo tanora koa maniraka anareo hanao fahalelany-panahy ka ho génération des bâtisseurs isika fa tsy ho démolisseur na destructeur fa mba ho génération mpanorina handavorary ny fiainantsika ao amin'i Jesoa ka handova an'ity tany mamintsika dia ny tranobe iombonanana mahasoà antsika fa tsy tranobe iombonana feno fasahiranana. Amen

Mompera Arseveka Mgr Benjamin Ramaroson